

藝文志。薛調咸通十三年卒年四十三。見唐語林。或各據所聞，筆諸篇籍，薛則直取向來豔傳之無雙，附會其事，而嗜奇之過，不中情理，反不如雲溪友議所載之崔郊，切近人情也。明陸采撰明珠記劇本，即據此文。

上清傳

柳理撰

據宋本資治通鑑考異校錄

貞元壬申春三月，相國竇公居光福里第，月夜閒步於中庭。有常所寵青衣上清者，乃曰：「今欲啓事，郎須到堂前，方敢言之。」竇公亟上堂。上清曰：「庭樹上有人，恐驚郎，請謹避之。」竇公曰：「陸贄久欲傾奪吾權位，今有人在庭樹上，吾禍將至。且此事將奏與不奏，皆受禍，必竄死於道路。汝在輩流中，不可多得。吾身死家破，汝定爲宮婢。聖君若顧問，善爲我辭焉。」上清泣曰：「誠如是，死生以之！」竇公下階，大呼曰：「樹上君子，應是陸贄使來。能全老夫性命，敢不厚報！」樹上應聲而下，乃衣縷麤者也。曰：「家有大喪，貧甚，不辨葬禮。伏知相公推心濟物，所以卜夜而來。幸相公無怪。」公曰：「某罄所有，堂封絹千匹而已。方擬修私廟，次今且輟贈，可乎？」縷者拜謝。竇公答之，如禮。又曰：「便辭相公，請左右齎所賜。」